

居官箴

運使 張光宇 邑人

釋為不恪則思鐘鳴鼎養君之優我何為將為不檢則思呵擁追  
隨民之仰我何為縱才力有限無補於上下也忍欺其君而蠹其  
民乎

蒞官十戒

武成

勿慢君子勿近小人勿易言語勿好才名勿聽讒說勿逞淫刑勿  
嗜旨酒勿尚浮贏勿作無益勿圖幸成

持已十箴

武成

如山之空如水之清如松之勁如蘭之馨如玉之潤如金之精如

劍之利如衡之平如矢之直如鑑之明

省刑箴

劉崇元

毋以國法任己喜怒毋以民命視若蠕環毋因民口訥舌躓輒加以深文巧語之愆一髮摘知痛一指嚙知憐一日伏敲朴三春耒耜懸一夫禁園扉八口釜鬻蠲杖頭人鬼判筆底死生連動植皆是命血肉總關天所以于東海仁聲億萬年

省罰箴

毋取民賣兒鬻女之錢以肥妻子毋攘民拆家離散之資以腴屋田毋召民搶地呼天之怨以供歌笑之筵一贖百畝稅一紙十日

僮一絹織婦淚宵旦幾餐眠顆粒耕夫血風霜幾苦酸斯民皆赤子  
慎重要保全所以楊伯起清風萬古傳

杖銘

逸士

賈中

余不揣愚弱謬希先民恒以宏毅自勵年踰古稀筋骨漸衰嘗記  
先儒有言一息尚存此志不容少懈辛先生有言永堅末路無變  
初心余佩服此訓欲自激昂因於所杖作銘以勗曰惟此木性何  
物可冒咸稱曰杖而敢名挺然首出正直性成撐天柱地勁骨崢  
嶸能荷重任能扶遠行能警放誕能持危傾余年少壯骨力頗勗  
獨往獨來焉有倚情老來衰損始思杖楨勿扶我攫虎豹勿扶我

隨懦頑勿扶我登龍斷勿扶我乞墦間勿扶我走邪地勿扶我踰  
大閤惟扶我謁上帝或扶我覲君前或扶我瞻往聖或扶我見祖  
先或赴友會或登師氈起我汾野過彼龍門由閩歷洛至濂溪村  
崎嶇世路險要疊關扶我歷越直登尼山顏曾思孟並趨齊班過  
門趨庭升堂入室夫子欵延相見禮畢高咏王風浪撫古琴聖統  
盡傳竭力謹述非杖力扶何及親密卽身後歸天知遇卒出昭格  
一堂俎豆舞佾亦賴爾扶我繼往開來有功於萬古學術

古硯銘

邑舉人

梁英毓

體則實心則虛動爲用靜爲居於戲帝鴻氏之物非徒藉資鈔胥

故絳城

宋  
司馬光

文公恢霸略征討輔周衰奕世爲盟主諸侯聽會期山河表裏在  
朝市古今移欲訪虬祁處鄉人亦不知

過文中子祠

明  
薛瑄

古人不可見古俗寧復淳依依萬春鄉疏屬連清汾良時曠莫與  
鳴鳥寂不聞悠悠禮樂志終與麋鹿羣顏波遊東極寒雪滿西津  
旨哉經世言淆雜多蕪榛時無伊川子此意將誰論

過太平懷古

明  
少叅  
盧彬

昔奉除書過故關偶聽汾水湧狂瀾王通墓左殘碑立趙盾祠前

老柏攢習俗尚存唐禮讓遺風猶有晉衣冠程嬰杵臼今何在忠義令人淚眼看

太平郵亭

明提學 沈鍾金陵

穹碑屹立道東旁知是文中子故鄉中說一編遺範在河汾千載德風揚漫尋舊宅基全廢載仰高山意孔長惆悵九原今不作惘然無語盼斜陽

贈李明府宗漢

名澗

宦游晉陽藩健若車轉運文中子故鄉昨宵始登進邑宰李邕孫比歲乃之任六事翁以張百里被膏潤聰明擅詞華匪直在廉慎

世家古中山巋然一奇儁  
詘茲試牛刀仰天爲渠問  
紛紛崑嶺間祇此孤峯峻  
湜湜清渭流濁涇豈堪混  
燕石解誑人荆璞竟遭擯  
所以貞丈夫特立奮而振  
名位安足懷臣也王之蓋  
俛仰宇宙間厥事皆吾分  
矧今聖明君恭已匹虞舜  
網羅入四門會當協輿論  
申章寫予私燕詞愧凡近

謁文中子祠

明邑令 李 潁 直隸

清曉函香出太平遠來祠下拜  
先生碑文剝落封苔蘚墟墓荒涼  
剩月明千古雲山凝眺望一時  
人物賴陶成可憐不見賢孫子  
流得汾河一派清

虎山橋

文徵明

虎山橋下水交流正是橋南宿雨收光福烟開孤剎迥洞庭波動  
兩峰浮已應浩蕩開胸臆誰識空濛是勝遊渺渺長風天萬里眼  
中殊覺少扁舟

宿碧照軒

烟閣雲房紫翠間白頭重宿舊禪關窓中坐見千林雨水面浮來  
百疊山勝槩何如前度好老人能得幾時閒賞心況有樽前客忍  
負春風寂寞還

題壁示里人

按察司  
李鉞  
邑人



余謝事家食避居村舍每聞愁嘆之聲自思在官之失因  
成俚語以寓勸戒相成之意云

東家愁西家哭愁哭何時是了足禾黍未熟先取錢鷄豚養大人  
食肉公輸不了私債催人情來去日相偎也是居官不恤民也是  
吾民貧自爲遇飲酒時便圖醉不當行處輒相隨如此之爲求不  
愁萬鍾之貴亦當憂我嘗求得去愁方勤儉相須不可忘勤則夜  
半不敢眠儉則年稔食不遑人能勤儉不相辜自能消除愁與哭  
吾鄉老稚肯相圖歲歲年年任有無

題桃花洞

明進士 趙桐 絳州

西峯好崖谷古洞入雲深野徑埋蒼蘚山花點翠岑樹移別院影

鳥弄故園音春晚列紅盡桃源何處尋

登龍腦峯

遙登姑射躡仙蹤一俯塵寰萬慮空汾水西來通陝右條山南峙  
拱河東水村晚映孤烟外苔蘚春生亂石中龍腦峯頭開道院令  
人千古憶猶龍

重九覺斯給諫招飲

王體復

藐姑雲氣下虛簷九日風光映畫簾青瑣豈應違汲黯黃花聊許  
醉陶潛萸房佩處香猶濕糕字題成韻欲拈記得龍山曾落帽却  
羞短髮已纖纖

題桃花洞

貢生

張邦器

姑射峯巔散曉霞欣從野店上桃花屢攀絕頂幽堪賞幾過清溪  
路未差虎穴相鄰無牧徑鳥飛不到有僧家我來欲下高人榻把  
酒停雲日已斜

菊下邀飲

澗館吟

郭衛宸

菊老不趨時主人莫漫疑事以後起貴物以孤行奇菊得陽氣多  
九月陽氣滋故于重九開花氣應時宜獨我園中者胡爾待至斯  
豈其有餘意留以與霜期况茲夜之深盈盈露如霏亂英綴金莖  
素魄棲逸枝景幽情自杳月若爲菊知我對客相酌月菊總入卮

清光合清香冷然沁心脾徙倚冥高下天亦下疎籬帶月移菊影  
人影共追隨把臂卽把月白練可裁詩恍惚有佳句鬼神遲我思

題文中子讀書處

大學士

吳 璵

廢洞依稀石麓陰山靈招我一來尋泥橫殘篆碑猶在門掩蒼厓  
鳥亂吟獻策緣知非釣主退耕何事已違心浮沉千載誰能識房  
魏區區尚古今

古柏吟

進士

鄭明良

賡颺

三清老柏臨荒廡籟集笙竽臥龍虎翠羽朝撐汾水雲蒼皮暮溜  
喬山兩頰雲苦雨不能摧說是仙人手自栽紫珮金冠歸何處漠

漠空壇一鶴來

謁文廟 盧邑侯重葺

王錫韓

不有盧夫子誰存鄒魯風  
四年車馬後百里管弦中  
月到平關白霞從泮水紅  
汾流清且淺何日酌吾翁

國士橋

先生蜀道驛程記蒙城驛北有橋曰豫讓橋在太平曲沃界

王士正

國士橋邊水千年恨未窮  
如聞桂厲叔死報莒敖公

黃河阻風

王奐會

風陵古渡對秦關  
欲渡風來浪打山  
隔岸分明聞鼓角  
沙飛雲湧

臥龍還

釣臺高

釣臺高高且險此心到底終無歉只是先生能不諂釣臺高高且  
促此身到底終不辱先生只是能無欲釣臺高峙幾千秋閱盡名  
浮利亦浮欲必諂兮諂必欲世間誰肯着羊裘天淡淡路悠悠清  
風明月等閑休幾人入得先生眼除是灘頭兩釣舟

鐵笛歌

君山老父吹鐵笛一聲裂破江天碧曲終不見已多年携歸自掛  
龍宮壁何人竊得到人間摩挲未忍輕拋擲百鍊精金夜吐光玲  
瓏七竅從空闕中有蒼茫萬古情指端壓處頻相逼楊柳梅花歷

亂生一時迸出愁千尺何況中宵月正明故園迢遞關山隔

### 榕樹行

嶺南榕樹天下稀大者徃徃數十圍其根蟠屈高出土狀如蛟龍  
朽骨無所歸其枝蔽芾垂及地勢如鳳鸞場翼不能飛行人避雨  
那用屋坐臥千人萬人足童童青蓋亘冬春一身破碎無完肉吁  
嗟乎木以不才終天年此言有理事果然君不見江南喬木無一  
全豈盡官家造戰船

### 山行赴黃州

爲訪竹樓蹤青山又幾重林幽人語響溪轉馬蹄慵寒照孤巖月

危吟萬壑松笑他新乳燕還徃意何濃

飲山滿樓和韻

春滿西疇雨乍晴山樓幾度約飛觥不妨卜夜人同醉莫笑當筵  
句未成帶露花嬌脂粉面咽風禽替管弦中艷陽時節清華地肯  
許平原獨擅名

解組歸里述懷以謝同好

知縣

李怡

萬樹秋來落葉稀余因解綬駕言歸無緣閉戶安衾枕有興携壺  
上翠微避俗嘿同天道近好閒常與世情違茅簷退隱堪藏拙何  
事流連不拂衣



素餐二載一無功歸入雲溪作釣翁政拙敢言迎竹馬才疎自愧  
對焦桐虛酬窻下三冬願徒剩衣間兩袖風惟有舊朋來慰問急  
流勇退比相同

孝順歌

貢生  
田雲

惟孝元初氣得之成性前是日立身本是日萬善源孝在父母兮  
父母順焉子不見夔夔者瞽瞍不頑孝至兄弟兮兄弟宜焉子不  
見王祥能得乎王覽孝至妻子兮妻子偕焉子不見龐氏孝謹日  
乾乾孝至子孫兮子孫法焉子不見柳子定省於門闌孝至童僕  
兮童僕聽焉子不見二婢兢兢母祖前孝至宗族兮宗族睦焉子